

FA'ASALALAUGA FA'ALAUATELE

ASO FA'APITOA MO LE AUFAGALUEGA MA GALUEGA A LE MALO O SAMOA 2023 & FA'ALAUILOA O LE POLOKALAME “*Talofa ma le Laufofoga Fiafia*”

O le Aso Fa'apitoa mo le Aufaigaluega a le Malo o Samoa o se sauniga faaletausaga lea e aloaia ma faamanatuina ai le tautua ma le auaunaga a tagata faigaluega uma a le Malo mo le latou sao taua ile atinaeina o le tatou atunuu. O le aso foi ma lona fa'amoemoe e fa'atauaina ai le tautua mo le aufaigaluega ua malolo litaea faapea i latou ua fai-i-lagi le folauga ma ua lago mau i ti'asa.

O le Aso Gafua 2 Oketopa 2023 ua avea ma aso e fa'amanatuina ai lenei Aso mo le Aufaigaluega ma Galuega a le Malo (Public Service Day), lea e faailoga ai le 12 tausaga o lenei faamoemoe talu ona faavaeina i le tausaga e 2012. O loo taula'i pea tapenaga ma polokalame o lenei tausaga i le Autū o le **“Agaga Tautua/Spirit of Service”**; ose fa'amanatu taua o lo'o fa'avae ai Auaunaga a le Malo, o le tautua, fa'aaloalo ma le lelei.

O le fa'amanatuina o lenei Aso Fa'apitoa mo lenei tausaga, ua vala'aulia ai e le mamalu o le Kapeneta le Aufaigaluega a le Malo o lo'o tautua i Ofisa a le Malo, e auai i le solo aloaia masani. O lenei solo tele a Matagaluega, Faalapopotoga ma Pulega uma a le Malo, e amata mai luma o le Ofisa o Leoleo ae faamaea i luma o le Fale o le Malo i Matagialalua. E fa'amaopopo uma i le itula e 6 ile taeao, ma e fuafua e amata le solo i le 7.30 i le taeao. Ona soso'o ai lea ma tulaga aloaia ma le Sauniga Lotu fa'apea le Saunoaga Autu e fofogaina e le Afioga ile Sui Palemia, e tatala aloaia ai le Polokalame o le aso.

E lē gata i lea, o taualumaga o loo aofia ai le Faalauiloa o le Polokalame o le **“Talofa ma le Laufofoga Fiafia”** o loo taitaia e le Malo. O lea fa'asalalauga e fa'atatau i le fa'amalosia o le tu'uina atu o le tautua poo le auauanaga lautele, aemaise o le auaunaga e fa'afeiloai ai le mamalu o le atunuu, i totonu o Galuega a le Malo. A'o fa'agasolo tapenaga mo lenei Aso, sa fa'aaogaina ai e le Ofisa o le Komisi ana fa'asalalauga fa'atekenolosi e fa'atino ai ia Pepa Fesili & Tali e fua i le va'aiga ma se maitau a le atunu'u i le tulaga lelei o auaunaga lautele, i totonu o le Malo. O lenei faatinoga ona o le fa'amoemoe e fa'atupulaia ma uunaia malosi i luga le Fa'alauiloa o le Talofa ma le Laufofoga Fiafia, ma saili ni fofa talafeagai mo le fa'aleleia atili o le auauanga lautele a le Malo.

O le lagolagosua o le Tautai, Ausetalia i le Poloketi ua faamautinoa ai le faaaofia ai o le auaunaga a le faaliliu upu e ala i le faalapopotoga o le Nuanua o le Alofa (NOLA) mo lea Aso Fa'apitoa. O le Tautai Facility Team ua fa'apea fo'i ona tu'uina atu le lagolago taua mo le fa'atinoina o le Fa'alauiloa o le Talofa ma le Laufofoga Fiafia, ma o lo'o tulimatai atu e le Ofisa o le Komisi e fa'aauaina lenei faigapa'aga i masina o lumana'i.

E pei fo'i ona fa'amanatu i tausaga ua tuana'i, e fa'amalosia ai Ofisa uma a le Malo ina ia fa'atulaga ni polokalame e fa'amanatu ai le Aso Fa'apitoa mo le Aufaigaluega a le Malo i se auala 'anoa, e fa'alauiloa atili ai i le mamalu o le atunu'u o auaunaga o lo'o latou ofoina atu.

O le fa'amoemoe maualuga, e fa'atino Auaunaga ale Malo masani i le mamalu o le atunuu i le afa muamua o le aso. O le afa aso e amata mai i le 1pm i le 5pm ua fa'atagaina mo Ofisa/Matagaluega ta'itasi e fa'atino a latou Polokalame fa'alotoifale e fa'ailoa ma fa'amanatu ai le sao o a latou tagata faigaluega i le atina'eina o Samoa. **E faamanatu atu i Ofisa uma o le Malo, o le “afa aso” e le tatau ona avea o se aso malolo.**

